



## SEKTOR ZA CARINE

**Broj: 03/1 34-7-60-156-2 /09**  
**Banja Luka, 10.04.2009. godine**

### REGIONALNI CENTAR ODSJEK ZA CARINE Banja Luka, Sarajevo, Mostar, Tuzla

**PREDMET:** Obavještenje o primjeni dijagonalne kumulacije u okviru Privremenog sporazuma, *dostavlja se*

Sektor za carine je od strane Projekta EU-TACTA, aktom od 06.04.2009. godine, upoznat da je Evropska unija objavila u Službenom listu EU, (serija C) broj 62 od 17. marta 2009. godine, obavještenje o mogućnosti primjene dijagonalne kumulacije porijekla sa zemljama uključenim u proces stabilizacije i pridruživanja, u slučaju kada je Evropska unija krajnje odredište za robe izvezene iz BiH.

U skladu s navedenim obavještenjem i odredbama člana 4. Protokola 2 o definiciji pojma "proizvoda s porijeklom" i načinima administrativne suradnje, koji je sastavni dio Privremenog Sporazuma o trgovini i trgovinskim pitanjima između Bosne i Hercegovine i Evropske zajednice ("Službeni glasnik BiH"- Međunarodni ugovori, broj 5/08), prilikom izvoza u zemlje EZ, proizvodima porijeklom iz Bosne i Hercegovine, smatrat će se proizvodi koji sadrže materijale porijeklom iz:

1. Evropske zajednice,
2. Republike Makedonije,
3. Republike Crne Gore,
4. Republike Albanije.

Uvjet koji mora biti ispunjen u ovom slučaju je da obrada ili prerada materijala s porijeklom, koja je obavljena u Bosni i Hercegovini bude veća od postupaka navedenih u članu 7. i nije potrebno da takvi materijali prođu dovoljnu obradu ili preradu.

Datum početka primjene ove kumulacije u Bosni i Hercegovini je onaj datum naznačen u tabeli u Službenom listu EU, (serija C) broj 62 od 17. marta 2009. godine.

U slučaju kada proizvodi s porijeklom neke od prethodno navedenih zemalja u procesu stabilizacije i pridruživanja, nisu bili podvrgnuti bilo kakvom postupku obrade ili prerade u Bosni i Hercegovini i stoga zadržali status porijekla te zemlje, carinski organi će pri izvozu u neku od zemalja EU ovjeriti potvrdu o kretanju EUR.1, u kojoj će u rubrici 4. biti naveden naziv zemlje čije porijeklo je zadržano, a i Izjava na računu treba biti popunjena na taj način.

Potrebno je imati u vidu da, zemlja s kojom se dijagonalna kumulacija koristi ima potpisan, odnosno u primjeni Sporazum o stabilizaciji i pridruživanju s Evropskom unijom, uključujući i Protokol o definiciji pojma "proizvoda s porijeklom" i načinima administrativne suradnje, kojim je propisan ovaj vid kumulacije. Stoga naglašavamo, dijagonalna kumulacija je za sada primjenjiva samo sa slijedećim državama: Albanija, Makedonija i Crna Gora, uz činjenicu da je također primjenjiva između BiH i Evropske unije.

Bosna i Hercegovina može primijeniti povlaštenu carinsku stopu iz Privremenog Sporazuma o trgovini i trgovinskim pitanjima između Bosne i Hercegovine i Evropske zajednice, ako

se u BiH uveze materijal sa EZ porijeklom iz neke od zemalja koje primjenjuju SSP kumulaciju. Zemlja izvoza u tom slučaju mora izdati novu potvrdu o kretanju EUR. 1 ili Izjavu na računu, gdje će „EZ“ biti navedena kao zemlja porijekla. Ovo nije dozvoljeno ako su materijali s porijeklom iz EZ uvezeni iz druge CEFTA zemlje koja nije uključena u SSP kumulaciju, a to su: Hrvatska, Srbija, Moldavija i UNMIK-Kosovo, kao i Republika Turska.

Zbog činjenice da sve zemlje CEFTA-e ne učestvuju u SSP kumulaciji, važno je da se u rubrici 7. potvrde o prometu robe EUR. 1 ili ispod teksta Izjave na računu unesu informacije vezane za primjenjenu kumulaciju sa svim zemljama sa kojima je korištena, a ne samo sa zadnjom zemljom koja je bila uključena u kumulaciju.

#### **PRIMJERI:**

1. Preduzeće iz BiH uvozi materijale iz Makedonije sa makedonskim porijeklom (*dokaz o porijeklu je izdat u Makedoniji na osnovu CEFTA sporazuma*) i materijale sa EZ porijeklom iz Crne Gore (*dokaz o porijeklu je izdat u Crnoj Gori na osnovu CEFTA sporazuma*). Finalni proizvod je proizveden u BiH i izvezen u EZ s BiH porijeklom. Materijali iz Makedonije i Crne Gore, mogu se smatrati kao materijali s porijeklom i dijagonalna kumulacija se može primijeniti.
2. Preduzeće iz BiH uvozi materijale s makedonskim porijeklom (*dokaz o porijeklu je izdat u Makedoniji na osnovu CEFTA sporazuma*) i materijale sa srpskim porijeklom (*dokaz o porijeklu je izdat u Republici Srbiji na osnovu CEFTA sporazuma*). Materijali iz Makedonije se mogu smatrati kao materijali s porijeklom i dijagonalna kumulacija je primjenjiva. Materijali uvezeni iz Srbije sa dokazom o porijeklu izdatom na osnovu CEFTA sporazuma se ne mogu smatrati materijalima sa porijeklom kada se finalni proizvod izvozi u EZ (*dijagonalna kumulacija sa Srbijom nije dozvoljena*).
3. Preduzeće iz BiH uvozi materijale koji su proizvedeni u Makedoniji s makedonskim porijeklom (*dokaz o porijeklu je izdat u Makedoniji na osnovu CEFTA sporazuma*). Ovi proizvodi nisu bili podvrgnuti bilo kakvom postupku obrade ili prerade u BiH. Preduzeće iz BiH izvozi ove proizvode u EZ. BiH može izdati dokaz o porijeklu, gdje se Makedonija navodi kao zemlja porijekla.
4. Preduzeće iz BiH uvozi materijale koji su proizvedeni u Srbiji i imaju srpsko porijeklo (*dokaz o porijeklu je izdat u Srbiji na osnovu CEFTA sporazuma*). Ovi proizvodi nisu bili podvrgnuti bilo kakvom postupku obrade ili prerade u BiH i iz BiH se izvoze u EZ. Dijagonalna kumulacija, u ovom primjeru, se ne može primijeniti, zbog činjenice da Privremeni sporazum (SSP) nije u primjeni u Srbiji. Proizvodi iz Srbije se tretiraju kao proizvodi bez porijekla (sve dok se Obavještenje ne objavi u Službenom listu Evropske unije, serija C)).

S poštovanjem.

#### **Prilog:**

- Obavještenje Evropske komisije
- Dopis EU-TACTA od 06.04.2009. godine

**POMOĆNIK DIREKTORA**  
**Bogdan Novaković**

#### **Dostaviti:**

- Naslovu
- Ministarstvo vanjske trgovine i ekonomskih odnosa BiH
- Odjeljenje za komunikacije (WEB stranica UIO BiH)
- 01
- 03/1
- 03/2
- 03/3
- 05
- a/a